

莆

陽

文

獻

鄭勲陳吉老傳第四十二

鄭勲字景周僊遊縣人嘉泰二年第進士知博羅縣
將改秩熊喬部下田戍卒焚掠惠城直抵其邑邑人
驚遁或勸勲避其鋒勲曰吾去如百姓何正衣冠坐
廳事以待之寇至諭以禍福不聽賊首迫以白刃勲
不為動罵賊不絕口遂死之時丞相崔與之侍郎李
昴英奉命招討以勲歿於王事聞于朝乞旌之以勸
忠義贈朝奉郎官其一子邑人思其遺愛為之立祠
靈跡甚著漕使以聞勅賜額惠澤

山岳志

陳吉老字子州先世許州人有名魯苗者為福州招

討使遂家候官繼遷僊遊祖浩父無逸

舊名

相繼登

進士第吉老以父任補官少通春秋三傳學孫吳兵

法慨然有志事功紹興初虜騎寇淮汀贛群盜竊發

辟吉老清流丞贛寇萬餘倭掠郡境吉老整衆而誓

士皆感奮大破之後以胡保鍾花之寇長子希造先

登死焉吉老忍痛悉衆長驅竟殲其黨比還郡將以

下迎勞為之惻然吉老笑曰馬革裹屍南人男兒古

人所慕大丈夫死患不得其所耳吾兒報國死又奚

足悲哉自是賊徒遠遁不敢犯汀界六邑爭像其父

于祠之陞本州別駕召除京東提刑牧復宿臺徐海

四州入對陳練將卒廣儲蓄修城堡紓民力嚴策應
五事高宗諭曰且爲朕緩懷京淮之民尋除揚州安
撫使賜鞍馬金帶御前大刀以寵其行吉老始至嚴
關渡之禁剝策應之法博節郡計大修州城捐俸以
助其實又遣仲子希錫取延陵私租千緡市汀布以
爲軍裝時韓世忠守楚州與吉老相厚善吉老奏乞
命世忠來相其役詔從之不數月而事集嘗書白太
夫人尹氏曰渾家飽煖盡是國恩萬一總師恢復自
當效節又書付希錫云吾萬一死於邊汝他日出官
不得取俸外錢謂之有例上負君父下辱祖先秦檜

當國力主和議吉老累疏爭辯其略曰講和之辱是
陛下爲劉豫舉國爲陪臣所約兩宮來期及許還關
陝諸路皆彼會相調引決不可信乞罷斥奸僧專責
臣以恢復之期御筆褒答云卿奮武淮壩國勢增重
鄰壤震懾朕實賴焉未幾卒于官高廟聞之嘆息不
已累贈中散大夫

出何

希造字賢御以父蔭補官吉老教子詩書之暇必令
讀百將傳習騎射每曰今中原擾擾正臣子捐軀報國
之秋非文武無資未易了此虜陷京口希造年十六被
虜至北庭令其牧馬一日北師南向希造擇平時所調

御最良馬乘以歸父益奇之每目為定亂器調揚州
掾參紹興初侍父官臨汀每戰必居前鋒屢奏凱捷
明年賊又入寇希造乘勝而前策應不至戰沒于义
竿口朝廷稱其忠節告詞曰朕憫失忠義之士殞身
賊手不得終於牖下肆加恤典并及其孤特贈承事
郎累贈奉直大夫出志何子光祖字世德以父歿王事
補官好儒重禮知英德府日上供泛輸幾倍光祖奏
蠲第四戶以寬民力湏陽渡湍惡舟多覆溺更創巨
艦以濟廖德明行部嘆曰陳公可謂依本分君子也
尋改知邕州州歲市蠻馬給邊其峒有奉議坊者先

為措置官擅移其利於他峒遂開釁端互市不通光祖以恩信招徠綱至溢數峒首李萬雄霸一方久為邊患光祖密遣思明州誘而擒之梟以徇諸峒帖息事聞特除廣東提刑光祖作欽恤編以戒僚屬新瀛溪祠以崇教道又捐故錢三千緡以代給邕兵之廩而凡一切無名之征悉蠲除之積官朝奉郎子沂自有傳同邑又有陳大亨字文通紹興三十年進士為人清勁歷五任貧無居室惟寓僧舍官至泉州通判

出德路志等書

沂字伯澡以父光祖蔭補官調潮州推官郡倉受納

監官例取斛面沂笑麾之會州有梁龜從等寃獄太守必欲寘之死沂力為爭辯囚得不死竟獲譴罷去沂自弱冠侍官南遊始篤志紫陽之學徧參劉燭廖德明李方子楊至諸先生之門而陳淳又沂所終身卒業者凡一時及門之士皆推沂為嫡嗣繼復受書易於蔡淵蔡沉若陳宓潘柄蔡和劉彌邵蔡模則皆其交遊也平居以禮法自將喪祭一遵朱文公家禮淳嘗為名其書室曰貫齋且為之記云

出德志

陳勲陳古老傳第四十二

薛林陳傳第四十三

薛奕字世顯興化縣人利和之從子也熙寧九年武舉第一是年徐鐸以進士第一神宗御製詩賜之有云一方文武魁天下四海英雄入彀中授鳳翔府都監遷正將元豐中銀川寨之役奕死之贈防禦使子安靖以奕死事補官靖康元年假河北制置使京城失守安靖降金知海州事紹興初乘間殺其守將王企中舉郡來歸高宗遣吏部侍郎傅崧卿賜以璽書其略曰身雖屈於羯胡心常存於王室總領義師擒滅醜類凡陷沒之郡聞風響應各籍土地奉上本朝

者實汝有以倡之也賜會稽田十頃以宗室女妻之
紹興五年除武節大夫業州刺史閤門宣贊舍人知

全州兼充本州沿邊溪洞事都巡檢使卒

雜出方志等書

林子立字伯與甫弱冠通經學為士類所推升貢辟

雍凡十二試俱中第二同舍贈以詩有云博陵公子

真文虎占斷儒官第二人登政和二年進士再調知

茶陵縣靖康元年詔諸道以兵勤王子立募集民兵

二千餘人率赴南道總管司至荆門遇胡騎接戰衆

寡不敵中流矢卒帥司上其事于朝

出岳志

陳自仁字克廣七世祖德字敏功仕唐為員外郎自

仁第宣和六年進士調吉州永豐縣尉屢捕盜有功
不官自陳以廉節著建炎三年金虜犯洪吉州隆祐
太后護衛兵叛所過殺掠楊世雄梁世美等遂犯縣
境自仁集尉卒調民兵激以忠義戮力拒討兩分其
兵一自間道統賊後一據險要以寡誘之見賊則偽
遁至所據與之合戰伏發於後夾擊之轉聞逐北其
衆披靡會賊別將繼至兵疲援絕自仁與知縣事趙
訓之皆戰死郡上其事制贈通直郎官其子孫志

薛林陳傳第四十三

郭徐彭龔鄭劉吳傳第四十四

郭義重

宋史無重字蓋誤

字處仁早遊太學以操尚稱年四

十餘客錢塘聞母喪徒跣奔歸每一動輒嘔血家貧

其故人有所饋不受聚土爲墳手賸松竹而廬于其

傍甘露降于墓上烏鵲馴集郡上其事紹興十三年

詔旌表其閭於所居前安棹楔左右建土臺高一丈

二尺方正下廣上狹飾白間以赤仍植所宜木

宋史本傳

義重貌古心不雜視不過尋丈口不及時事其旌孝

時猶未婚與仕紹興二十一年始以特科奏名補官

右迪功郎潯州司法叅軍調德慶州錄事叅軍年六

十始娶以高年終鄉士大夫為立孝子祠而私諡為

孝節公

述事

四世孫道卿

道卿母徐病劇哀泣籲天祈以身代母尋愈後母以
高壽終景炎元年元兵至旁盜亦起道卿日抱母柩
泣曰兒在此無恐俄卒入至殯所失跌墮乃知其為
孝子也為白大將遺一矢為後卒戒俾無毀其家又
因盜至居人竄匿道卿與弟佐卿獨守義重孝子祠
不去遂俱被執盜將殺佐卿道卿泣告曰吾有兒已
長弟弱子幼請代弟死佐卿亦泣告曰吾家事賴兄
以理請殺我道卿固引頸請刃盜相顧曰汝孝門兄

弟如此吾何忍害兩釋之道卿年八十子廷煒字景
文為建寧路平準行用庫使歸侍養時兵禍猶未解
廷煒扶道卿出避賊倉卒相失哭水濱一晝夜有柅
校心哀廷煒為迹道卿舟歸之道卿嘗病疝危甚廷
煒憂悴扶護一夕髮盡白道卿卒疑死者兩日苦塊
中偶夢道卿並枕睡汗浹寤呼燭視之左頰生二黑
子與道卿肖號慟幾絕每夜三鼓即炷香悲哭烏亦
群集哀鳴芝產園中事聞武宗勅有司旌其門閭

元史本
傳等書

徐膺字思文弱冠登名於禮部不報退念其母年高

不忍離因閉門讀書定省溫清無違禮俄而母病躬侍湯藥不解帶既歿摧毀骨立卜葬于虎嘯巖負土為墳廬其旁蔬食三年時陟巖顛焚香額天哀號震地虎為遁去烏亦翔集甘露一再降既卒從父狀元鐸題其墓曰有宋孝子徐公之墓

出志

鄧受為太學士親歿廬居墓側有白鵲之祥郡表其居曰孝行卓異坊又有黃希閔提舉國鎮之子父歿廬墓人號孤廬黃家

出北事

龔垺初為泉州銅場從事調福建提舉司屬官父疾不解衣帶不入房閨連丁家艱廬于墓側者凡六年

日食自塩築外無他嗜婦病還舍命醫自於戶限外
視之戴星還山亦未嘗自言蒲之善居喪自鄭閩清
燭後鮮有及之者

出備志

鄭褒字成之希閔之孫應進士舉至輦下會詔罷去
遇王元之留褒俟秋而行褒曰褒有老母向之去數
千里別數百日者欲干名而顯親故雖遠且久若在
母左右今詔下將及閩吾母必計程以待遲一日即
貽母一日憂元之曰生有純孝足警世之爲人子者
爲之泣而賦詩曰褒也甌閩士文高所益修干名達
詔罷歸計逼親憂鷗鳥終相狎公卿設欲留刺桐花

下宅蘭蕙奉晨羞後登咸平第判福州以便行養

出此

劉洵直字子浩年十二父亡十六失母時已知苦學
篝燈几筵之旁號慟即誦書率至夜分嘗一夕族父
聞哭聲甚哀問故曰讀馬周傳至其言少失父母
馬之養無所施為之悲感不能自止諸父奇之而以
鄉舉試禮部爲第七人登紹興二十一年第調永春
縣主簿秩滿授漳州教授終通判平江府贈金紫光
祿大夫子渠棠皆登進士第

出此

吳稟字可中父世寧客遊西蜀卒於渝川稟年未冠
家居聞訃日夕悲悼沿峽扶柩以歸舟危於旋渦若

有物負之者時號孝子

出何志

郭徐彭龔鄭劉吳傳第四十四

陳傳郭黃許傳第四十五

陳亨運字俊民仙遊縣人性最孝父母繼歿處墓三年常倚墓木而哭木爲之枯鄉人張鉉有詩曰生芻淨潔全清節老栢焦枯爲孝思乾道間朝廷舉孝廉鉉率鄉人白之縣令陳景肅以其名應詔亨運臥廬不起令不能奪餽粟帛以旌其孝

出僊志

傳孝明字起敬嘉定己卯秋母蔣氏疾篤孝明剝股粥以進疾遂瘳陳侍郎謹書孝感二大字名其堂作詩以紀之令許伯翊偕同官載酒宴其母子盡歡族姪知循州大巖記其事王少卿邁爲跋

出僊志

郭濟家貧至孝寶祐五年父病判股以進病遂瘳庶
母病篤亦刲股者再鄉人以其事白之令趙與泌給
錢米以旌其孝

出僊
誌

黃廊字大器興化縣人太常博士中庸之曾孫平江
令徹之子也事親孝芝產于廬者三鄭夾溪樵爲文

紀之

出比
事

許天麟字仁甫崇福里豪林人父應祥喜佛好施天
麟家甚裕病族人貧富不均闢居仁堂以處之又與
共爨平生事父甚謹會父疾憂鬱百方冠衣不脫及
卒苦塊三年葬而廬墓側又三年扁墓亭以永思嘗

刺血寫佛經集千僧誦經以資冥福是日雷電四方
其繞壇五里天朗日明人以為孝感竹圃柯舉白郡
守將聞于朝天麟曰彼雨此晴偶然爾吾何德哉夫
求聞于上者慕名也吾將為名乎乃寢後生母蔡氏
卒送終廬護一如父死之日至正中年七十四一日
召子姓與語沐浴更衣書偈端坐而逝

出備志

陳傳郭黃許傳第四十五

吳李林方傳第四十六

吳興屯田員外郎祭之從弟時號長官唐神龍中以家貲築延壽陂溉田萬有餘頃復墜海為田築長堤以障海水開溝大小六十餘條以導其流為泄六十餘所以殺其水時有蛟為孽堤數潰興毅然誓衆欲除其害遂攜刃入蛟潭斬之卒與蛟俱死潭中鄉人建祠祀之宋咸平初進士鄭褒為之傳紹興十九年郡守陸渙奏封義勇侯至今莆田稱水利比洋曰吳長官南洋曰李長者云

雜出趙志等書

李宏有唐裔也其先有因安史之亂避地來閩者遂

卜居候官之福星坊世雄於財宏輕財好施人稱為長者初永春仙遊二縣水合趨于莆入海言利者謂橫而堰之可灌田數萬畝治平間長樂錢氏女提金大如斗來據溪上流築陂甫成而壞繼而進士林從世捐貲十萬緡築溪下流亦壞熙寧八年宏應詔而來有僧智日者為相地於木蘭山下宏乃率衆錢七萬餘緡為之陂遂成乃開溝大小百有餘條以導陂之流作斗門以啓閉諸溝之水設涵泄以疏通斗門之所不及者復築塘為田由是莆南洋之田萬有餘頃皆賴以灌溉民食其利立廟於陂上春秋祀焉景

定三年詔封惠濟侯降璽書褒諭郡人夾添鄭樵尚
書林大彝皆有記今子孫居於廟之左右食宏之田
以奉祀事官仍復其家又有吳諷者莆田人唐屯田
員外郎祭之後初官司選土著大家食陂之利者輸
差正副以司財穀以時巡視而脩治之特在選者十
有四人而諷與焉十四人者余氏三人朱氏七人陳氏林氏
吳氏顧氏各一人皆莆田人吳即諷也
子孫繼是役者年有酬勞日有食錢蓋以先世有功
於陂故特加優厚迄今猶然每歲春秋祭宏其十四
人者皆得與享云出岳志弘治間邑人御史周進隆疏
於朝檄下本府縣春秋致祭

李富字子誠唐游擊將軍尚吳之裔也避武氏亂由泉州南安徙游洋後復遷于莆之洋尾富好施與嘗於郡境內造橋梁凡三十有四所出南郭五里許建亭以憇行者凡二所又助郡庠之役築瀕海之隄前後捐金錢累鉅萬以祈毋壽毋享年九十有八而終人以為施與之應建炎初粘罕犯順富率義兵隸韓世忠麾下授承信郎宣使張淵聞富材略辟充殿前統制司幹官弗就辭歸養年七十八卒至今莆鄉樂善之士必曰李制幹云子三人廷輝保義郎廷耀承務郎廷麟將仕郎

出岳志

林國鈞字公秉早嘗游場屋率不利自三舍法罷遂
不復有仕進意高宗朝以其子嘗由里選版授迪功
郎加承議郎賜緋衣銀魚致仕國鈞為人好施與務
以積陰德爲心聞鄉鄰之貧乏者取貲財使人投諸
暗中以助之不使其或知也嘗建紅泉義學延族子
光朝爲師置義田以贍四方從學之士白湖去城三
二里舊有浮橋紹興初更造石橋一時有力者又欲
移建於木蘭陂下謂是處江流且縮而兩隄突起國
鈞以爲此說正相反惟江濶岸平則無喧壓撞擊之
患遂傾貲倡衆以相其成又伐石砌抵城之路凡二

十餘里年九十齒髮落而復生作亭名曰回年陳俊卿為書其扁因以自號既歿光朝銘其墓子二人充南安軍司戶叅軍褒建寧府司法叅軍孫恂如少嘗從光朝學後選莆舊家十四人為木蘭陂正副而恂如與焉

詳見李完傳

持誠秉公以民事為己事陂南岸隄

決數十丈恂如傾貲彈力而修築之水以無患至今

與十四人者並配饗李宏之祭而子孫亦世食酬勞

之利云

出岳志

方祐字天貺慎從之曾孫也為人恭約好禮嗇已厚入高價買產賤價糶廩值荒歲則傾困無吝色每福

巾野服徜徉道旁野叟村童歡喜出迎曰長者來矣
饑食寒衣病藥死棺人人滿意有持䟽以橋道請者
靡不遂其求若延壽迎僊二橋脩建皆厚施之其孫
萬少時讀書至已所不欲勿施於人祐語之曰此吾
平生受用得力處小子識之祐之存心如此故時人
以長者稱之莫福平山後人又因以福平長者為號
云

出其玄孫大
琮所記遺事

吳李林方傳第四十六

元

陳朱顧黃傳第四十七

陳旅字衆仲父子脩號博古時朝廷遣使購鄭樵通志略得寫本監使方廣翁家廩訪使孫澤屬子修與同郡鄭鉞共校讎之盡復樵聯比詮次之舊上於朝廷鉞於學官兄震亦有文行由教官歷泉州路經歷同安縣尹終福清州知州致仕卒

出呂公事述

旅幼孤資稟穎異其外大父趙氏學有源委撫而教之旅得所依篤志於學於書無所不讀稍長負笈至溫陵從鄉先生傳古直游聲名日著用薦者為閩海儒學官適

御史中丞馬祖常使泉南一見奇之謂旅曰子館閣
器也胡爲留滯於此因勉游京師既至翰林侍講學
士虞集見其所爲文慨嘆曰此所謂我老將休付子
斯文者矣即延至館中朝夕以道義學問相講習自
謂得旅之助爲多與祖常交口游譽於諸公間咸以
爲旅博學多聞宜居師範之選中書平章政事趙世
延又力薦之除國子助教居三年考滿諸生不忍其
去請于朝再任焉元統二年出爲江浙儒學副提舉
至元四年入爲應奉翰林文字遷國子監丞卒旅於
文自先秦以來至唐宋諸大家無所不究故其文與

雅峻潔必求合於古作者不徒以徇世好而已有文集十三卷旅平生於師友之義尤篤每感虞集為知己其在浙江時集歸田已數載歲且大比請于行省親奉書幣請集主文鄉闈欲為問候計乃衝冒炎暑千里訪集于臨川集感其來留旬日而別惓惓以斯文相勉惓然若將永訣焉集每與學者語必以旅為平生益友也一日夢旅舉枉相向曰旅甚思公亦知公之不忘旅也但不得見耳既而聞旅卒集深悼之

元史本傳

鄭杓字子經僑之玄孫寅之曾孫與陳旅為文字友

膏著春秋解義表義覽古編次夾漈餘穀樂府又有

衍極五篇衍極記載三篇

衍極書事許字書吳康齊與胡謂考論文字之學此為最正

尤善大字辟南安縣儒學教諭福建宣撫使齊伯亨

嘗采其所著衍極書上之子燁字宗晦至正末為福

清州龍江書院山長洪武中辟興化縣儒學訓導天

才逸出八分書能世其學云

出倫

朱文憲字元道登至治四年進士授建寧縣尹有惠

政及人遷汀州路推官陞福建等處儒學提舉以永

州路總管致仕卒文憲居官行事多有可稱尤博學

善屬文有葵山集宋景瀛為序稱其言醇而理彰子

瀟洪武初進士第任兵馬大使

志出舊

顧長卿字子元祖孺俊與兄孺履同第宋嘉定四年進士長卿少有志經傳子史無所不闕人目之爲書厨應部使者薦歷安溪南平兩縣學教諭福州路教授長卿雖居官不廢脩讀所得俸專爲著述費移書助教陳旅責其不作遼金宋三史旅以書示學士虞集曰江南有此秀才大不易得既而長卿恐旅未能任此遂自爲之及謁選京師會朝廷開局脩三史長卿即以所著藁上中書得辟史屬以議不合移疾出又以朝廷郊祀禮成進南郊慶成頌一十五章不報

所著三史頗希世不嚴華夷正閏之辯而書遼金之事皆與漢唐宋並例故其書竟無傳云

出事

黃方子字潛剛洎之後慨然以家訓世德為念博學強記汲汲於其所欲為者嘗攝武城縣學職禮部尚書宋本以使事至莆見之驚喜還朝將論薦之會本病卒不果方子好著書有東家書目載所著書數十種然所說多異朱子故不為人所尊信云

出近記

陳朱顧黃傳第四十七

陳劉方林傳第四十八

陳紹叔字克甫唐御史大夫稜之後也其先世居大浮山之西曰西陳後有析居金沙者故紹叔為金沙人而猶以浮丘為號學者因稱為浮丘先生紹叔幼好學博覽群書洞達性理終日危坐一室俯而讀仰而思有得則喜而不忘或中夜起爇燭書以識之從游日衆則教以篤行謹信為先文辭間辯為後嘗為學者說書璣衡遂擇木為儀象以示之既而鑄銅倣古制又別制器象天體虛其中而縣之上刻周天度數而以鈿螺填之揭南北二極凡天河星宿皆列其

名其色絢爛使夜視之與天象合圍四尺五寸有奇
極其精微名曰小天由是名重當時有欲白之郡府
表章于學有勸達于朝者紹叔皆謙不敢當至於河
圖洛書太極通書律曆制度靡不研究有外集百餘
卷題曰浮丘集歷代紀年大元官品競辰切字擇日
又若干篇諸子百家之書咸覽誦而考訂之圖中庸
大學周易於東西壁浮丘書室之左為尊經閣以虔
奉先聖身未嘗衣絲帛深衣大帶以為常所居僻陋
處之澹如也有田數十畝供饘粥而已毋家不振有
喪莫能舉紹叔負土立石表以鄭塚有詩曰土堆埋

王起愁雲立石栽松洒淚痕敢效大夫題鄭塚竟遺
一女嫁陳村石田茅屋誰爲主麥飯茶盃外有孫寄
語耕犁莫相及免教過客見銷魂孝友之心類如此
其居鄉與人言必稱孝弟忠信言語平易使人易曉
忽一日思其親友遍至其家既而得疾越七日卒年

七十有一

出林以順所著墓誌銘

劉有定字能靜其先與夙朝同出元豐進士似之遠
孫也少貧性任直不嗜榮進沉潛志學與涇陵趙伯
暉遊而陳旅鄭杓輩皆其友也工於詩嘗著原範吟
三十七章論易通學者因稱爲原範先生司業吳源

謂原範吟推闡圖書之秘發揮象畫之妙究極先後
體用之所以然乃知此老胸中有一部全易也又作
泮宮嘆百韻以譏議路教葉應禮又嘗箋解杓所著
衍極書五篇皆梓行于世

出人物志

方德至初名臨生以字行公權之孫也擢元至正十
一年第為人敦厚不妄言笑家甚貧教授生徒以爲
養而與其妻廖氏相安於窮苦澹泊之中後廖氏雙
盲父母欲去之臨生感然婉諫曰婦無故奈何去之
其他行事亦多有足尚者授官永嘉縣丞代歸不及
再叙卒

出事述

林以辯字子泉積仁之後祖應成字汝大嘗受學於黃績得潘柄陳宓之傳咸淳中與長子棟同登第歷官宗正寺簿宣撫司機宜宋亡不仕父栖贈曲陶郡伯以辯通易書春秋尤善說詩皇慶中詔以科目取士以辯不苟求合究心程朱之學福泉之士爭聘為師方在泉山一日促歸未浹旬卒朱文憲稱其明死生之際云拙事

弟以順字子木擢至治元年第廷對不諱幾黜左丞張士瞻直之收寘榜末除海寧丞調慶元縣尹縣有弟殺兄陰以賂免以順發其獄誅之移浦江尹平反

死獄新作夫子廟秩滿改台路推官總管焦昂建招
安海寇之議以順沮之慮以姑息亂天下後果如其
言陞江西儒學提舉改知福清州時元政失經豪強
橫起海港中劫殺尤多以順漸收除之亦思巴奚之
黨監福清州為衆所殺其酋賽甫丁檀省政因以順
酋敗去乃得歸尋除同知福州路總管府事致仕

陳劉方林傳第四十八

莆陽文獻列傳

國朝

吳源傳第四十九

吳源字性傳曾祖鳳舉博學多才第宋咸淳元年進士歷官貴州司法封州教授至宗學博士入元故官例逼授府縣之職鳳舉亦強起知興化縣數月辭歸扁其堂曰修初以見志源早孤自知力學通諸經尤深於易惇禮好義學士大夫皆推下之至正末舉泉州路訓導

太祖皇帝洪武三年復以明經授興化教諭遷府學

教授十三年以薦特賜詔徵之其略曰朕聞君天下
以圖治為本安黎庶以得賢為先故令百司各舉所
知今中書舍人林延綱薦爾學精德邁智志過人特
遣使齎符命有司禮送至京朕當試用焉於是與杜
敷龔敷趙民望李祐俱應召至命為四輔官魚太子
賓客位列公侯都府之次屢降制諭欲其均調四時
繼令各司春夏季上中下旬而源則司夏季中旬每
講明治政必以得賢才敦教化養黎元為圖治之本
甚見嘉納

上間遊東苑命五人侍相與聯句為七言近體詩一章

上先倡首句曰踞盤龍虎肇豪英五人者遂繼之曰

五色輝雲炫日明

臣杜牧

王氣瑩然垂景象臣民風樂

爾見昇平

臣龔

山河百二金陵最

臣民

宇宙千秋帝

業成

臣

上復繼之曰暗憶六朝興替事臣杜牧遂

足之曰禎祥未盡又加禎詩成上呈恩禮優裕冠于

一時源尋以老歸明年上念其賢復賜詔曰曩者

朝臣薦卿學行是用召卿至廷官以四輔而卿告年

老難於步趨遂命還鄉今者朕選公侯子弟入國子

學司業缺員生徒無所矜式卿其為朕一來講道授

經無筋力之勞而有成就後學之益亦儒者之素志

其速來勿有所讓源復赴京授國子監司業未幾卒
于官出彭從吾
蕭陽縣志姪陽保舉鄉薦為國子博士陽保之
孫昭成化戊戌進士官終廣西按察副使

吳源傳第四十九

林圭陳賢傳第五十

林圭字信玉曾祖棟與其父應成同第宋咸淳進士
祖岡孫與其弟以順聯登元延祐至治進士稱為聯
桂林家父師說蔭授縣尉洪武初圭舉明經為莆庠
訓導陞寧國教諭滿九載以科第不及數復教其邑
勤於為教風雪不廢其去也諸生塑像學宮祀之居
儒官三十餘年前後六為考試官永樂間應召脩大
典以老請賜冠帶致仕圭治經有師法工古文詞推
重一時達官至莆者必禮其廬鄉後進多問業焉平
生篤倫紀敦道誼元季兵起祖母方避難山中與兄

璜琤繼沒圭辛苦負葬并葬其從父兄外父母凡

幾喪孤幼盈室撫教成立及致仕歸視其子教諭乾

於如臯經蘇杭遇道殣善視之與同食飲其人賴以

全活年九十四而終

雖出一統志等書

林為莆望族久而可

徵者惟忠臣蘊之後最盛岡孫之孫琚珩琥皆起儒

術珩為桂林知府琚琥並郡縣學職諸孫泰吳川知

縣以順之孫曾洪武甲戌進士官終廣東僉事有庶

名圭之孫宗越皆舉鄉薦宗蘄州學正楊州教授有

師道蘄人祀之於學宗之孫俊成化戊戌進士歷官

刑部尚書今以太子太保致仕其學行風節別當立

傳侃僖同舉鄉薦侃終南雄通判僖終壽州知州俊之子遠正德甲戌進士今為南京吏部郎中

陳賢字廷傑靖之後兄觀陝西叅政賢洪武末舉儒士為興化訓導秩滿遷南康教諭求樂中召入館閣預修大典改任湖口致仕賢為人嚴毅方直安貧好古其學以躬行為先雅志恤物勤心職事及門弟子成就者衆號為古道先生湖人塑像於學沒因以祀之泰和楊文貞公士奇為墓表稱其士行可質於神明蓋實錄云

出彭志

子淮以孝行稱

淮字巨淵幼有至性在父母側必親視膳服有疾侍

湯藥頃刻不離永樂間賢官南康淮隨任每日鷄鳴而起孳孳承志所須皆先辦洪熙元年賢告致仕卒于京師淮迎樞歸至寧化次于河澣夜宿樞旁岸多虎或僕避之淮曰吾父在此竟不去夜大雨懼河溢樞且歿撫樞呼號雨忽止姊嫡母方出有贅婿方欲析居淮重違其情涕泣引咎遜姊腴田美器而取其棄餘母乃悅復許同爨淮後為國子生值限年例衆謀為減年籍淮曰籍可減心不可欺也寧黜而歸置義塾訓鄉子弟家門肅睦遠祖僕射靖墓被人侵毀淮焦苦十餘年百計陳懇上官卒復之縣上其孝卒

年八十三子大同亦有孝行志林司寇見素題其
居曰述孝里

林圭陳賢傳第五十

方徵林仕敏林長懋傳第五十一

方徵字可久大琮六世孫洪武五年中鄉試遂授給事中兼齊王府錄事蒞官恒思效職志節甚偉

太祖皇帝一日晚朝謹身殿退顧徵問知有母在次日賜白金五十兩給驛歸省嘗奉旨廣西徵行改監察御史月餘陞懷慶知府時因星變求言徵條上數事首言風憲官以激濁揚清為職今乃計其事績多寡定為優劣故不聞旌拔廉能專務羅織人罪多徵賍罰此大患也又言朝廷賞罰明信乃勸懲之道去年各行省以用空印罪其官吏而河南叅政安然山

勸懲哉其餘皆關係特政上諭旨安然率齊東海軍
民內附朱叅政鄉里舊人有才幹故議功議能而擢
用之且爾言羅織人罪者何人多徵賍罰者何官宜
具實以聞徵言如河南僉事彭京不坐被告知事于
觀而逼令招賍攀人出金二十兩銀一百兩代納此
臣所知者坐是降沁陽驛丞十三年以事逮至京卒
年三十二嗣子璿舉鄉貢任諸暨訓導

出彭志

林仕敏名世懋以字行祈五世孫也父善同工詞賦
弱冠魁堂試尋領鄉薦第七授泉山書院山長元社

既屋遂不仕洪武初例起閒良官以祖母年老辭既而復起之行至建州寄所作顧氏義妾詩有有妾猶知遵禮義此身那肯負綱常之句竟死於道仕敏勿端重閭閻善詩文洪武二十六年領鄉貢入太學明年署大理少卿尋授戶部郎中以言事貶南丹衛軍吏永樂改元擢拜南康知府寒暑衣服取給於家屬郡雖仕敏率屬罪已懇禱翼日蝗盡飛去以母憂去官服闋改知淮安府清介愈厲時部臣至淮街仕敏與之抗禮乃以不防水患劾之貶南寧府鎮鄒巡檢以捕盜功不願陞遷改宜興縣教諭所著有芹邊集

匡廬小稿子勤由鄉貢歷任奉新教諭以學行稱
林長懋字景時蘊之後父獻中泉州府學訓導長懋
永樂三年舉鄉試除南昌教諭陞青州教授十八年
擢翰林編修侍 皇太孫讀書洪熙時轉春坊中允
長懋以老成自處凡小愆違多所匡救 仁廟崩從
臣乞從東宮赴京長懋不便鞍馬乃以舟行既至
宣廟已即位從臣皆進官長懋陞知靜林州因上言
官僚遷擢同異者數人且言二弟一為部屬一為監
生路遙母孤願降繁難京職積忤下錦衣獄一繫十
年溫習不廢 英廟登極遇赦之官以恩信撫下自

奉清儉朝夕食惟鹽菜人因呼為林鹽永年六十卒
於官無子長懋為人剛嚴捐貲非其人不交往僚友
間少不合輒面斥其過族人戶部郎中定以吏胥進
絕不與通性耽書手不釋卷為文質而有味出彭弟志
道節永樂乙未進士授刑部主事長懋下獄時調平
樂通判遷知瀘州以賢能著稱奉勅陞鶴慶知府以
母喪解官卒于家出一統志

方徵林仕敏林長懋傳第五十一

陳繼之陳彥回傳第五十二

陳繼之涵頭人革除庚辰進士授戶科給事中以江南僧道多占腴田蚕食百姓乃奏僧道人給田五畝餘以賦民從之時靖難師起繼之間有建白輒肆指斥洪武三十五年六月京師平與太常寺卿分宜黃子澄兵部尚書漂水齊泰戶部侍郎定遠郭任翰林侍講寧海方孝孺等俱族誅

出彭志

陳彥回龜塘人父立誠洪武初舉秀才再除歸安縣丞以罪被刑家屬謫戍雲南之臨安至蜀遇赦無資以歸時同縣黃積良知定遠縣收彥回為其家人因

改姓名曰黃禮會閩中教諭嚴德政以彥回明經舉
保寧訓導九載考績

太祖親擢為平江知縣洪武戊寅高廟晏駕彥回
捧香進京師給事中楊惟中等舉彥回文學廉幹宜
加擢用陞徽州知府丁祖母郭氏憂徽民汪侃等百
餘人詣闕奏留未報庚辰春彥回乃疏其改姓歷官
情罪首實于朝乞正名籍得宥為民尋有旨復其原
官留治郡事明年三月復蒞徽逾年會北兵起彥回
召募義勇赴援壬午詔械送京師棄市

出府志

陳繼之陳彥回傳第五十二

林環楊慈傳第五十三

林環字宗璧後塘人唐九牧章之後幼倜儻不羈聰慧過人凡閱書多成誦下筆成章方在泮時文章已為人所重求者相踵永樂四年廷對第一授翰林修撰明年陞侍講預修永樂大典為書經總裁官兩考禮闈會試較名籍甚十三年扈從巡幸卒于北京年四十環負材學曉世務特為

文廟所器一時儒碩亦厚望之迨沒無不悼惜焉弟

珪亦有文行舉泉州府學訓導

出彭志

子繼舉鄉貢為

考城教諭珪子思承第景泰五年進士選為御史辭

弗就除冀州知州州有蕪田二千頃歲賦如常民益
流徙思承率同官奏蠲其半漳河數為州患增築堤
堰以禦之延袤百餘里選部郎中陳雲之弟佐冀屬
邑毆殺平民思承被委驗治或為祈免歎曰以人命
媚人惡在為民父母卒正其罪滿九載民詣闕留之
不果從遷淮安府督糧同知年未六十引疾致仕歸
幾二十年年七十九卒彭司寇從吾銘其墓稱其為
廉退君子云孫偃偁同舉鄉貢偃黥縣教諭偁國子
助教思承子茂達弘治十五年進士今為四川布政
使偁子禋禎皆舉鄉貢禋瑞金知縣禎宜春教諭

楊慈字惠叔城右人伯父寶壽陽知縣慈少孤性穎悟不甚讀書為文間有論辯愛出人意表凡所賦作操筆立就蓋天才絕高非學力所能至也永樂六年鄉試第一明年會試第二九年廷對第四選翰林庶吉士是年七月卒年才三十慈軀幹豐偉志氣軒昂恒以科第文詞為儒者末事人惜其早夭有文集五卷孫元以鄉貢授休寧教諭

歸志等書

林環楊慈傳第五十三

黃壽生陳用陳道潛傳第五十四

黃壽生字行中東黃人滔之裔孫也兄和中行在禮曹郎中壽生莊重孝友洪武末舉鄉薦以親老求歸侍養水南諸賢率從之學若會元陳中進士徐資用輩皆門下士也親終入太學再試京闈第一永樂九年登進士第選翰林庶吉士預修性理大全諸書成授檢討九載將滿考試禮闈得疾卒雖出一統志等書于時故官類焚殖以歸壽生子子嘉獨負柩還葬安福教諭徐安祖聞其孝行舉為其學訓導用薦知束鹿縣正統己巳之變胡寇焚掠畿甸子嘉率衆保障縣賴

以完初邑戶不滿二千後乃至三千餘戶滿九載邑民保留加六品俸復任三載乃歸長子深字仲淵景泰二年進士拜監察御史卒次仲昭自有傳深之子乾亨成化十一年進士任行人奉使滿刺加過海禍朝廷遣官諭祭贈行人司副子如金字希武弘治十八年進士選庶吉士授御史提學南畿終廣西提學副使希雍舉鄉薦自壽生至乾亨如金三世辭元為科目盛事彭司寇惠安公謂自乾亨而上居官立身皆廉約恭慎學問文章世濟其美為莆名族之冠陳用字時顯城右人也舉鄉試第一登永樂九年進

士第選翰林庶吉士時行在開東館徵天下名儒纂修五經四書及性理大全諸書用預馬書成授本院檢討丁外艱起復留南京宣德間秩滿陞脩撰正統初轉侍講凡掌院事二十餘年用為人質實醇厚言動不苟身後竟無一息士類爲之盡傷云

此彭志

陳道潛字孔昭東洋人革除廢辰進士授給事中調夷陵州判永樂初復爲監察御史預脩性理大全諸書于時諸書諸儒翰林春坊多不得預部屬寺監亦無幾人御史陶道潛以行已恭慎學問該博在選道潛與兄道亨相友愛兄以子少讓財產不受會元陳

中嘗稱其家仕者可爲居官之法隱者可爲族里之法道潛孫岳字孟申成化丙戌進士授戶部主事辛孟綱上饒教諭輪廣州教授曾孫元綱衢州教授玄孫文滔弘治己未進士終江西按察僉事文淮舉鄉薦磁州學正論者謂道潛與陳繼之同舉進士同居給舍靖難之師至繼之族道潛但薄謫而已蓋不能無憾云

黃壽生陳用陳道潛傳第五十四

陳方李王傳第五十五

陳中宇舜用黃石人大卞之後永樂十八年鄉試第二
明年會試第一賜進士出身資性簡率才思豐贍
登第後歸家嘗與諸名士遊壺山真淨巖次盧希韓
詩律一韻二十首頃刻而就詞致清新人服其敏文
章健直類其為人正統初自南京戶部主事就留史
館預修

文廟仁廟實錄成陞本部員外郎滿九載無意榮宦
遂致仕幽棲貧居吟咏自樂公門關節終身未嘗及
之卒年八十三姪孫璵舉鄉貢威縣教諭陞國子學

正璉之弟琬為邑庠生兄弟俱有文行而相繼夭卒

士林惜之

出彭志

方澣字源深仁岳之後以諸生貢入太學舉應天府鄉試第七正統四年登進士第授行人澣時年出五十隱然老儒猶執經講說不已扣問者紛如酌告罔倦尤邃禮學動止語默不苟嘗嘆文公家禮一書諸儒註釋而去取或晦朝代遷改而冠服不同於是著附列圖於首條析於下其高第殿元柯潛嘗序行之未六十求致仕歸抱經固窮未嘗輕入城府學者稱為柳東先生卒年八十二蕭俗自水南徐資茹先生

家冠婚喪祭依約家禮而行著為規範質文可觀至
澌又篤好是書考究服誦春秋家祭不事浮屠吉
慶吊抑奢從儉鄉人亦多化之弟新韶州府同知子
和叔領鄉貢為石塘教諭孫岳有文名成化五年進
士亦為行人澌獲及見之後轉南京監察御史以言
事左遷泰州判官陞常州府同知山嶠及新之孫宜
賢皆鄉貢士嶠景州訓導出彭志山雷州府同知宜賢
吳川知縣宜賢子一桂一蘭同第嘉靖二年進士
李廷脩鄭莊人曾祖允實武城知縣伯父璣萊州知
府有廉直名廷脩登宣德八年進士第除中書舍人

性穎敏每厭時俗不務讀書嘗曰後村先生文集今日全不識終日呻吟程文如何得長進故於為學多通強記詩文清麗正統末陞太僕寺丞天順改元陞少卿皆以滿九載而遷蕭自洪武以來登朝士大夫未有秩正四品者自廷脩始得之人以為榮

志出彭

王偉字士俊第永樂十六年進士授大理寺評事陞雲南府知府以仁厚為政夷民悅服嘗遇歲旱禱雨有應兵部尚書王驥征麓川道經其郡美以聯句曰三旬亢旱黎民悴一雨滂沱太守功鎮守雲南都督沐昂尤重其為人及卒民哀慕之偉遂經學上文辭

宣德正統間莆諸老在翰林者凋謝已盡惟偉與陳
會元中並以文章擅重一時云

出景泰志

陳方李王傳第五十五

鄭方柰何林傳第五十六

鄭雲字行從伯玉之後登洪武二十一年進士第授
監察御史陞湖廣僉事改山西以事左遷兗州府同
知復陞廣東右叅議為人廉慎仁恕詩詞文采亦有
過人者年未五十卒

出彭志

林時字學敏唐侍御史謹之後永樂十三年進士除
陝西按察僉事巡歷邊荒辨反疑獄甚多寧夏甘涼
地寒少布歲發鳳翔延安等府粟以餉卒時奏聽民
與戍卒自相對輸大布一端抵粟一斛中布三端抵
粟二斛至今便之又奏設武學令軍中子弟得由科

目隄於是禮部推行天下皆設衛學秩滿陞貴州按察司副使蕭進士釋褐為方面時與余文林坦三人文由山西僉事轉知常州府坦歷湖廣廣西僉事陞貴州按察使然風槩皆不及時弟祥敏道州訓導子純內丘教諭姪續潼川州訓導

出彭志

魯孫世明峯知

縣

方鯉字廷訓大琮之後永樂十六年進士授南京監察御史南宋諸名臣家自遭元世以來皆零落不振獨鯉能邁往超俗以紹前芳郡人推仰性資剛果遇事必為居六察日風采凜然號為材御史遷知彰德

府丁內艱服闋改知紹興府相越皆大郡鯉以嚴明
蒞之吏畏民愛號為良二千石以疾致仕卒孫瑤程
鄉訓導

鄒述字季述少貧力學永樂十九年登進士第授刑
部主事宣德中公事坐累調惠州府通判部負山濱
海有鹽鐵之利兵民商竈治難治述有精力為政
端平清訟牒均徭賦禁暴繩亂民不敢犯政聲大著
他郡有難決事亦以委之擢知南雄府地狹民貧且
苦役繁述權鹽酒定馱取息息輕積衆舉以雇役餘
代民雜需民既安業乃重新郡縣廟學每五日輒一

庠學宮規諸生所業而激勸之士風爲之一變郡舊有凌陂溉田五十餘頃久廢述重築之民蒙其利又郡自張九齡奏開庾嶺植松數十餘里又多摧枯述補植之人懷遺愛比以爲棠陰云及致仕郡民乞留不果從兄子儒龍川知縣

出彭志

余擢字叔炫登永樂十三年進士第知進賢縣爲人勤敏廉介力正上官和買之弊九年秩滿行李蕭然民思之爲立德政碑吏部考最例當陞職待次間以母老告歸省宣德十年少師楊文貞公薦之馳傳赴召至授吉安府通判掌泰和縣文貞泰和人以其制

邑故特薦耀事無巨細一斷之以義主之以公雖富
勢不可奪人目之爲沉水缸邑以大治毋喪解任服
闋改通判饒州部運京糧卒于棗河

出彭志

何誠永樂末貢入太學正統間拜虹縣知縣廉正愷
悌每詣村落教民版築植桑久而民賴其利後以疾
卒囊橐蕭然虹人共買棺殮之其妻南京人昇其柩
欲即父家塋之虹人懷其德不忘乃遷柩塋于縣之
山川壇右復建祠焉

出通志

林和宇致雍前塋人洪武中登鄉貢授博羅知縣爲
政寬慈不尚鞭朴增修武村堤以防水患民受其利

志一官終戶部郎中

鄭方柰何林傳第五十六

林文陳音傳第五十七

林文字恒簡號澹軒與環同出宣德五年廷對第三
授翰林編修正統初預修宣廟實錄成轉修撰時
年已五十官將九載僅循常調不爲優叙不計也丁
內外艱服闋復除舊職景泰三年陞春坊諭德兼翰
林侍講四年修歷代君鑑成七年修天下郡誌成陞
庶子仍兼侍講天順元年英廟復位罷康定特官
僚文改尚寶司卿兼職如舊時翰林應轉學士者七
人上疑其多兵部尚書陳汝言進曰唐有十八學士
是不爲多遂拜學士四年請老上謂內閣李賢曰林

文老成忠厚不可放去仍留供職八年 憲廟卽位
以舊講讀官陞太常寺少卿兼翰林侍讀學士再乞致
仕歸文雖年逾七十然神觀清爽應對精明安靜守
禮接人無大小皆以誠意朝野士大夫踵求詩文酬
之無倦色體格溫淳自成一家縉紳推爲醇儒咸自
謂不可及也兩考會試一讀廷試卷學者稱爲上林
先生卒年八十七贈禮部左侍郎遣官諭祭營葬于
載孫剗曾孫渠希範皆舉鄉貢載中書舍人剗金華
知縣遷錦衣衛經歷

出彭志

渠建水知州希範漢陽同

矣

陳音字師召別號愧齋。江人。宋明州觀察使。卒之
後。天順八年進士。選爲翰林庶吉士。授編修。與修

英廟實錄成。進侍講。擢南京太常少卿。命兼掌南京
翰林院事。陞本寺卿。卒。音爲人和易坦率。細事無可
不可。至分別義利。則界限截然。在翰林時。嘗上疏陳
時政數事。剴直不阿。權璫黃賜有母喪。省寺院監罔
不吊祭。翰林亦有倡議欲行者。音奮曰。堂堂翰林相
率而拜內豎之門。奈天下笑何。議遂止。西廠初建。太
監汪直方用事。勢張甚。其爪牙輩者。夜率邏校入
兵部主事楊仕偉家。收縛仕偉。并掠其妻。衆悚汗莫

測音與比居亟乘墉大呵曰爾何人乃擅辱朝臣其人曰爾何人音曰我翰林侍講陳某也其人為之少戢太學士劉吉之起復也音移書止之其後當路有缺吏部欲擬音吉曰陳某腐儒也不可其為少卿滿九年乃進卿音問學深博學者至席不能容登高第顯名于時者甚多為古文肆筆而成率平實有理致求之者無虛日遺藁累數十卷弟員子舉華俱領鄉薦華登進士第員嘉興府通判

出府志

林文陳音傳第五十七

柯潛吳希賢傳第五十八

柯潛字孟時號竹巖自幼警敏嗜學十歲喜賦詩十五能爲舉子業弱冠領鄉試入太學景泰二年廷對第一授翰林修撰益自淬礪學行日以進明年陞春坊中允兼脩撰預修歷代君鑑天下郡志成累受賞賚七年陞司經局洗馬天順元年例罷官僚潛改尚寶司少卿兼職如故充東宮講官八年陞翰林學士成化元年修主牒三年修英廟實錄成陞詹事府少詹事兼翰林學士四年命日侍經筵未幾丁父憂踰年母歿既葬詔起復爲國子祭酒懇求終制不拜

九年服闋將赴京忽得疾卒年五十一遣官諭祭營
葬潛質貌俊偉容止雅飭爲文章平安整潔詩尤清
婉接人外若樂易而內實狷介鄰郡有中貴人寵冠
一時士大夫欲求速化者爭趨其門潛獨不往其人
素慕潛文詞屢欲屈致一見將有所求而潛卒不往
天下學士大夫仰之以爲異人期以大用天順中李
文達引共事以資尚淺而止成化初吏部屢薦入
內閣南宮皆不果從考兩京鄉試者一禮部會試者
再所著有竹巖稿弟江通州學正子宗文以蔭授中

書舍人

志

吳希賢舊名衍以字行更字汝賢別號靜觀唐屯田
員外郎祭之後希賢幼敏異登天順八年進士第選
爲翰林庶士時同年李東陽號稱神童希賢才思
敏贍獨與之相角遂拜檢討預修英廟實錄時有
貴家子冠姓者密以賄丐希賢致半詞於其父希賢
厲色拒之曰苟爲此他日何以見董狐諸公於地下
耶進修撰陞左春坊左諭德南京翰林侍讀學士卒
於官希賢性豪邁負奇氣於人少許可爲其所可者
恒頌不輟口兩考會試所得多俊偉士爲文章意新
語壯詩亦清俊奇崛每僚友宴集或聯句或分韻倉

卒累數百言立就弟希達姪彰德俱領鄉薦希達常
州府教授彰德湖廣按察司僉事

出府志

柯潛吳希賢傳第五十八

翁世資傳第五十九

翁世資字資甫號冰崖父瑛舉鄉貢官至翰林檢討
掌國子監助教事累贈戶部尚書性喜酒樂易姻黨
無小大咸恩視之饒幼穎敏自其遊鄉學時器識已
如老成人侍父官京師因乞入太學應正統陸年順
天府鄉試七年禮部會試俱中第七授戶部主事政
暇輒繙閱舊案究其利弊涉躡廣記且明習國朝典
故凡條例因革悉所諳練大為部堂諸卿佐所敬禮
嘗以部檄往通州監收軍士冬衣布花因奏言所以
貯庫歲轄於通州諸衛宿弊極多宜改屬有司則其

弊可革從之丁外艱歸景泰改元本部尚書金濂以
時方多艱求可以裨謀議者因奏起復世資固辭終
制明年服闋復除戶部遂委世資專典各司章奏有
大議必與商確未幾陞署本部郎中適江南水災部
以屬世資勘驗因奏免應天太平寧國安慶廬州等
府及建陽宣城等衛稅糧五十餘萬石芻束倍之且
檄所司賑恤英廟復位之元年覓會試同考試官
時太臣多罷上謂姚夔翁世資俱可大用遂擢夔禮
部世資工部俱右侍郎三年命往淮徐督運大木回
內織染局上言先遣官往蘇杭等五府提督織造上

供文綺七千疋未完今計各項賞賜等用又合別遣
官督係加造七千疋世資謂東南水潦民苦艱食宜
當撙節以甦疲困與尚書趙榮左侍郎霍瑄議減其
半榮瑄皆有難色世資曰倘得罪某請以父子三人
當之疏進上疑其要譽推主議者下世資錦衣獄貶
知衡州府先是郡有疑獄數十人世資至悉爲直之
治郡汲汲以革宿弊厚風俗爲務新廟學修石鼓書
院立便民倉凡郡政所不可少者皆以次修舉衡衛
帥有不循理法者世資稍抑之遂誣世資怨望逮至
京師上不直衛帥削兩階調任復世資官成化初陞

江西左布政使適廣東寇發王師南下有獻計欲令
江西轉餉計當用十萬人世資議齎銀就廣中糴穀
以餉民以不擾屬大旱軍民多轉徙乃大發倉廩賑
之且爲奏蠲民賦百七十餘萬石仍免一應雜泛差
科境內以安五年陞都察院右副都御史巡撫山東
明年秋東土大饑世資日夜講求荒政發廩勸分遣
官分道賑恤民賴以濟八年遷戶部左侍郎十三年
奉敕提督京通等處倉場明年進本部尚書職掌仍
舊十七年召掌部事世資久處計司財賦出入劑量
盈縮罔不懸合事宜以年及再上疏懇求去遂加太

子少保致仕行至儀真卒年六十九贈太子少傅遣
官諭祭營葬世資居官四十餘年謙約和厚善兄弟
廣交友家無餘貲所著詩文有冰崖集若干卷兄世
用正統戊辰進士官終貴州叅議莆人父子兄弟同
時登朝自世資家始世之子達孫機皆舉鄉貢任知
縣世資子洪第進士爲工部主事泳舉鄉貢世資家

傳

翁世資傳第五十九